

太上洞玄靈寶五顯靈觀華光本行妙經

爾時

元始天尊於赤明劫初 在大羅天上玉清聖境清微天中 九光元陽之殿 與太上玉晨道君 太上玄元老君 諸天上帝 坐九色龍鳳寶座 垂十絕靈幡羽蓋 玉童玉女散諸天香寶花 遍滿十方 是時九鳳齊唱 八鸞同鳴 天樂自響 靈鳳聚煙 獅子白鶴 嘯歌雕雕 天無氛穢 山嶽藏雲

元始天尊現神通妙力 垂九色祥光 天宮玄都莫不煥然 下燭十方 無極世界 俱同一相 琉璃清瑩 洞徹無礙 表裏分明 十方無極 飛天神王 至尊大神 一時同會 于時

東方九炁青帝天君 侍真靈官無鞅數眾 浮空而至  
 南方三炁赤帝天君 侍真靈官無鞅數眾 浮空而至  
 西方七炁白帝天君 侍真靈官無鞅數眾 浮空而至  
 北方五炁黑帝天君 侍真靈官無鞅數眾 浮空而至  
 中央一炁黃帝天君 侍真靈官無鞅數眾 浮空而至

雲集法會 稽首恭敬 咸聽 咸聽

太上洞玄靈寶五顯靈觀華光本行妙經

清微藏書閣

元始天尊說無上玄元真一妙法 諸天神仙 步虛旋繞 三界侍軒 同聲讚詠 當此之時 喜慶難言 幽關重開 並受光明 苦爽幽魂 一時解脫

一時解脫

時 會中有長生度世真人 萬福好生真人 慈悲普濟真人 越班整佩 執簡而出 稽首上白天尊言 天尊大慈 天尊大聖 肇開

天地 運度陰陽 為萬靈師 為群生父 臣等宿緣流慶 得侍至真 忝居真列 今者得預大會 拱聽法音 宣演重玄 俱蒙開化 恩

不可量 臣等伏心下方世界 魔鬼流行 侵害生民 三災競起 五

毒興行 水火刀兵 凶年饑饉 死亡至眾 甚可哀傷 未審以何因 緣 遭罹此苦 恭惟天尊至仁善貸 開度群迷 大宏濟度之門 廣

布慈悲之化 天尊曰 汝當攝念存誠 吾當為汝演說善惡因緣 良久曰 原夫上

元之時 人多淳朴 與天地同體 惟道是修 教化眾生 使歸正道 不為物觸 心廣體胖 無有損傷 克終壽命 中元之人 稟謙和

美厚之人 施慈惠溫良之德 存恤孤寡 拯濟飢貧 後已先人 務行方便 下元之人 生處世間 造惡不悛 不修善行 道德久廢

仁義不行 不敬天地 不禮三光 不畏神明 不孝父母 不忠君主  
不念師尊 信從邪見 不省本源 損物害人 欺心罔道 貪婪無  
厭 積惡招愆 恣縱六情 莫知己極 善惡童子 四直功曹 糾察  
使者 錄其罪目 日夜上奏天庭 由是三官鼓筆 五帝考書 削字  
青編 注名黑簿 遂使司命司錄 司功司殺 減算除年 或在世非  
橫連綿 運意乖錯 所謀不遂 輒軻競生 疫癘流行 致多天喪  
或命過之後 淪沒九幽地獄之中 無有善念 得脫幽關 凡此罪因  
皆由心造

諸真人聞是語已 不勝哀憫 再拜上白天尊言 臣等欲仗慈悲  
威光之力 分身下降人間 救度眾生 俾令男女處世安穩 去離邪  
橫 富貴長壽 災害不生 魔鬼心消 道化日顯 君明臣良 國祚  
延永 干戈屏息 天下太平 時和歲豐 萬民樂業 伏望至尊俯從  
志願

天尊曰 汝今欲令利益末世眾生 方便啟問 發如是願 善哉善哉  
且萬物吾生 萬靈無化 救度眾生 固當如是 然不勞汝真烈  
汝當靜念在心 吾即為汝演說利益眾生救度之門

### 太上洞玄靈寶五顯靈觀華光本行妙經

清微藏書閣

天尊曰 三天境內有靈官大聖 華光五大天帥 發弘誓願 救度眾  
生 攝伏群魔 闡揚道化 威靈烜赫 功德巍巍 與道合真 度人  
無量 隨聲赴感 捍厄扶衰 無願不從 延生賜福 或現一身 或  
顯五相 或化為諸天天帝 或化為梵王帝身 或化為吉祥如來 或  
化為日露天主 或化為華光菩薩 或化為天丁力士 或化為妙行真  
人 以此種種神通 隨機攝化 救度眾生

真人復問 此靈觀大聖 以何因緣位居天帥 現十方種種神通  
妙相  
天尊曰 此靈觀五大天帥 稟五星五炁之精 毓五方五靈之秀 化  
身三界 應現十方 掌三界禍福之權 持萬物生殺之柄 吉兇悔吝  
悉屬陶鎔 若或有人一稱其名號 曰靈觀大聖華光廣化天君 當  
知神通立現 克副願心 如影隨形 似聲應響 昭然感格 莫可稱  
量

真人復問曰 仰惟 天尊好生之德 澤被三途 恩霑萬彙 廣  
福天人 作度人之津梁 啟歸真之徑路 伏願特垂救旨 遣降人間  
福國安民 宣揚玄化

天尊於是以金簡玉符 遣金童玉女 敕召靈觀五大天帥 倏忽之間  
靈觀五大天帥恭臨法會 長跪道前 上言 臣等仰沐生成 忝居  
真列 今日大慶 特蒙敕召 得詣瓊軒 仰睹天顏 聽宣妙法  
天尊曰 世間男女 不崇正化 造惡不悛 以矯詐為本心 以貪婪  
為己行 放縱情慾 背正向邪 積種種罪源 莫知懺悔 致使地祇  
效奏 天律譴誅 召惡招殃 冤讎纏結 報對昭然 毫分不失 又  
復有陣亡鬼兵 下道妖邪 伺人間隙 把人年命 追人魂魄 攝人  
精氣 與其邪黨 侵害良民 或命未盡而遽亡 或有全家而疾疫  
俯觀此輩 良可憫憐 汝宜下降人間 分身化氣 應現十方 收攝  
群魔 使歸正道 俾下元之人 離諸患難 見存眷屬 悉獲安寧  
已往先親 咸皆超度 爾時天尊即說靈觀咒曰  
玄元始祖 三炁氤氳 開明三景 頂立乾坤  
保制劫運 使天長存 三天主帝 上帝高真  
修真闡教 利物濟人 變調元化 福國安民  
靈官大聖 華光之君 神通無極 上佐帝宸  
分身化氣 三界遊巡 濟生度死 福善禍淫

太上洞玄靈寶五顯靈觀華光本行妙經

清微藏書閣

禳災度厄	辟毒驅溫	廣宣號令	役使雷神
手持金鎗	足踏火輪	火瓢火鷄	飛焰星奔
金磚萬疊	雷火燐燐	天目一視	三界齊欽
順風千里	善惡皆聞	六丁六甲	三五將軍
雷公電母	擲火流金	風伯雨師	播雨興雲
天丁力士	隊仗紛紜	封山破洞	馘滅鬼群
魔精最伏	潛跡海濱	敢有拒送	攝魄收魂
金鎚裂腦	鐵戟穿心	鑿天大斧	斬截其身
烏風一掃	化作微塵	九州社令	血食之賓
城隍主者	聽吾指陳	佐助玄教	積累殊勳
元始玉字	八威龍文	普告三界	萬靈咸遵

急急如律令

天尊復謂真人曰 世間男女 或有妖邪魍魎 山魃木客 古器伏屍  
土怪石精 水脈旺魅 不正等神 變易形質 拋磚放火 攝人魂  
魄 占人宅舍 百種形狀 惱亂眾生 凡有是諸患難 善信男女  
速宜齋戒沐浴 或於古觀靈壇 或於本居淨室 建立三清寶座 五

帝靈壇 然香點燈 獻花酌水 投詞露懇 拜表上章 皈命三界高  
真靈官大聖 持念真經 誦詠神咒 首愆謝過 請福延生 靈觀大  
聖應時感格 部領五百靈觀大聖 金磚金鎗 火瓢火車 火鷄大將  
無面目大將軍 白蛇大將軍 順風千里使者 五方雷神天將 銅  
頭鐵面六天吏兵 火部率眾 流金擲火 掣電轟雷 一合下降  
掃蕩妖氛 驅逐不祥 肅清境界 人鬼分離  
生民安泰 靈觀元帥 威神之吏 莫可稱量  
凡有見聞 各宜恭敬 若復世間 亢陽為沴  
積陰為癘 祝融扇禍 江海失經 或干戈互起  
人民流亡 蟲蝗為妖 蠹食禾穢 如是災難  
皆當依儀 醮謝天地 轉念真經 皈命上玄  
祈恩請福 即得國土清平 風調雨順 百物清潤  
河清海晏 又若世人 星辰衝戰 祿馬休囚  
疾病纏綿 求安無路 或修墳立宅 干犯土皇  
或官司牢獄 冤枉不伸 或疫癘流行 人民困弊  
或江河轉運 波浪驚危 或曠野山林 惡獸奔突

太上洞玄靈寶五顯靈觀華光本行妙經

清微藏書閣

或夫妻刑隔 嗣續未蕃 或水陸經營 惡人值遇  
或咒詛相仍 侵凌眷屬 或身懷六甲 母子未分  
或在世孤貧 謀為阻晦 或門戶閉塞 畜養不生  
或買遷經木 財物散耗 或塚訟微呼 先亡復連  
如是等種種災難 皆緣世人積惡深厚 以致禍患來鐘 福瑞希  
降 若能

依儀行道 罄志投誠 剖露腹心 皈依懺悔  
即獲平安 神明護門 道氣滋扶 一切災難  
應時消散 又若世間男女 為先祖宗親父母亡沒  
起心薦拔 冀徹孝思 即得魂出幽關 逍遙快樂  
永辭沉結 上生天堂  
是經功德 不可思議 存亡獲福 善利無邊  
於是 真人得聞語已 誓願流傳 讚嘆靈觀大聖 而獻頌曰  
高上太微 中有玄虛 五行全妙 萬法希民  
化身三界 變現十方 道合自然 國泰民康  
說是頌已 法會眾真 無鞅仙聖 咸皆稱善

天尊再告真人曰 世間男女 能依吾所授 奉教而行者 皆道心深  
重 宿有善緣 尊崇供養 萬災不干 吉祥如意 眾善齊降 諸惡  
不生 更能於四時八節 三元三會 五臘十直 甲子庚申 月旦本  
命 是諸良辰吉日 如法自持 自然千真萬合 福壽延長 七祖九  
玄 均獲超度 更能傳授世人 敬信讀誦 福利無邊 是經功德  
果報照然 不可思議  
天尊說是經已 靈觀大聖敬奉教旨 下降人間 廣宣玄化 十方天  
真大聖 無鞅仙眾 稱揚讚嘆 歡喜踴躍 稽首禮謝無上虛皇正真  
三寶 作禮而退 謹奉道旨 敬為流傳

太上洞玄靈寶五顯靈觀華光本行妙經竟

天運壬辰年寅月正一天師清微弟子洪鼎堅羅大英恭錄彙編

太上洞玄靈寶五顯靈觀華光本行妙經

清微藏書閣